



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL

Komunikadu Imprensa

Periodu: 2011

Edisaun: 20/07/2011

JSMP-FOKUPERS lansa relatóriu konabá Lei Kontra Violénsia Doméstika

Iha loron 20/07/2011, JSMP servisu hamutuk ho FOKUPERS, lansa relatóriu análiza kritiku ba Lei Kontra Violénsia Doméstika ho titlu *“Infrenta dezafiu violénsia doméstika iha Timór Léste; lei foun bele lori rezultadu?”*. Lansamentu refere hala’o iha salaun Delta Nova, Dili.

Diretór JSMP, Luis de Oliveira Sampaio haktuir katak: *“objetivu husi relatóriu ne’ebé mak lansa dadauk ne’e, hodi halo análiza ba Lei Kontra Violénsia Doméstika, fo sujestaun konabá interpretasaun preferidu ba provizoins xave sira nomós terminolojia balun ne’ebé la klaru no possibilidade implikasaun ba interpretasaun espesífiku iha pratiku.*

Iha parte seluk Diretóra FOKUPERS haktuir katak: *“rekomendasaun no sujestaun sira ne’ebé mak inklui iha relatóriu ne’e ho intensaun atu provoka deit diskusaun diak liu tan no promote asaun ba oin hodi atinji objetivu sira ne’ebé mak hatu’ur ona iha Lei Kontra Violénsia Doméstika”*

Tuir JSMP no FOKUPERS nia observaun katak; maske lei ne’e tama ona en vigor durante tinan ida, maibé vítima sira violénsia doméstika, nafatin infrenta dezafiu oin-oin hodi prosesa sira nia kazu liu husi prosedementu formal ne’ebé mak iha. Dezafiu sira ne’e laos mai deit husi limitasaun rekursus umanus no facilidades suporta, maibe dezafiu balun mos mak mai husi lei ne’e rasik, tanba entre autór judisiáriu sira nomós organizasaun forneseadores apoiu ba vítima, sei hasoru dezafiu oin-oin intermus kuñesementu nomós interpretasaun diferentes ba lei ne’e rasik.

JSMP-FOKUPERS konsiente katak situasaun sira hanesan ne’e kontinua afeita ba iha vítima sira hodi hetan asesu ne’ebé mak adekuaudu no proteze sira nia direitu no interese atu asesu justisa ne’ebé mak justu no kredivel bázeia ba espíritu no objetivu husi lei ne’e rasik.

Relatóriu ne’e fahe ba sesaun ha’at mak hanesan: *primeiru*; halo interpretasaun no análiza kritiku konabá Lei Kontra Violénsia Doméstika ne’ebé mak foka liu ba definisaun provizaun sira, prinsipiu fundamental sira, no utilizaun propriu ba informasaun. *Segundu* análiza ba asuntus kriminal sira, sentensa, konfidensialidade no konsiensia. *Terseiru*, papel lei ne’e iha nivel alegasaun, inklui dezafiu sira iha pratika no ikus liu mak subliña observaun xave no mos rekomendasaun pratika sira.

JSMP no FOKUPERS hein katak liu husi análiza no rekomendasaun hirak ne'e, bele ajuda ita hotu, liu-liu ba orgauns forneseadores sira hodi fornese apoiu no assistensia ne'ebé mak másimu ba vítima violénsia doméstika no asegura katak vitima sira hetan apoiu ne'ebé sira persiza durante no depois prosesu hot-hotu ne'ebé afeita sira nia interese.

Atu hetan informasaun kle'an, favor kontaktu:

Luis de Oliveira Sampaio
Diretór Ezekutivu JSMP
Email: luis@jsmp.minihub.org
Landline: +670 3323883

Maria Barreto
Diretóra Ezekutiva Fokupers
Email: fokupers2003@yahoo.com
Landline: +670 3321534